

## **Aallussineq, isumassarsiorneq sapiissuserlu**

*GrønlandsBANKENip Inuussutissarsiornermut Aningaasaateqarfiata aallarnisaasunut nersornaasiuttagaani pilerisaariffik pilerserlaaq Deluxus Studio ajugaavoq*

Inuussutissarsiornermut Aningaasaateqarfiup aallarnisaasunut nersornaasiuttagaa Kristian Lennert-ip maajip tallimaani tunniummagu aallarnisaasut suleqatigiit inuusuttut, Christian Fleischer Rex aamma Lars Frederik Andersen, qungujulasorujussuupput.

Aallarnisaasut 20-t piukkunneqarsimapput. GrønlandsBANKENip Inuussutissarsiornermut Aningaasaateqarfianut siunnersuutit tamarmik misissorluarneqarsimapput. Angutit inuusuttut marluk Nuummi pilerisaariffimmi Deluxus Studio-meersut toqqarneqarput, ilungersornermikkut nutaaliortumillu isumassarsiornermikkut piffissap sivikitsuinnaap ingerlanerani Deluxus Studio ingerlalluartutut suliffeqarfinngortissimagamikku.

## **Iluatsitsineq**

Inuussutissarsiornermut Aningaasaateqarfiup siulittaasuata Kristian Lennertip erseqqissaatigaa suliffeqarfik pilerisaariffiusoq kalaallinit pigineqartoq, sullississutai tuniniagaalu Kalaallit Nunaanni noqqaassutigineqarlualereersimasut.

-Aaqqiissutit isumassarsiaalluartut suliffeqarfiit nunani allani pisiarikkajuttagaat neqeroorutigisarpasi. Niuerfinni amigaatigisat iluarseqataaffigaasi, taamaalilluni avataaniit pisiarisartakkat unammillerlugit, tamannalu Kalaallit Nunaannut iluaqutaavoq. Attaveqaatit teknologiillu nutaat aammattaaq periarfissippaasi sullitat nunatsinninngaanneersuinnaanngitsut aammali nunanit allaneersut sullissinnaallugit. Taamaaliornikkut aallarnisaasunut allanut takutipparsi, niuernikkut najoqqutat isumassarsiornermik periarfissanillu eqqumaarinniffiginninnermik tunngavillit Kalaallit Nunaanni imminut napatinnerusumik aningaasarsiornermik ilapittuutaasinnaasut, inuusuttut oqaaseqarfigai.

Deluxus'ip suliaasa ilagaat nipilersoqatigiit Nanook-p nuusiaata saqqaa nipilersorneranniillu video-liaq, fiilmimut "Hinnarik Sinnattunilu"-mi najoqqutat aamma ukiamut KNR-ip nangeqattaartuliassaa "Siunissaq pilersiguk".